



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

43. Kalenderwoche – ab 19. Oktober 2008

Sachsenmeyer nimmt die Abstammungslehre mit all ihren Mängeln und Eigenheiten mal richtig unter die Lupe...

Fählgonschdrugsjohn

Eens dud fesdschdehn - dor Mänsch an sisich is eene ziehmlische Fählgonschdrugsjohn!

Nee, da kann sisich dor liebe Godd nischd droff einbildn, wennor werglisch dährjenische is, dähr dähn Mänsch fabrizierd had. Un wennor dähn ooch noch nachm eischenen Vorbild fabrizierd had, dann muss dor liebe Godd e ziehmlisches...äh, sach mor ma... e ziehmlisches Gnallooche sein.

Abor isch will jedzde ma gahr nisch so off de geisdichn Dehfizidde anschbieln... das, was sisich de Mänschn immor widdor seid dausende von Jahre fiehr Bleedsinn un fiehr Vorbräschn ausheggd dun, das dud ja werglisch off keene Guhhaud gehn!

Nee, isch will ma bei dor rein madoriellen Seide dor mänschlichn Gonschdrugsjohn bleim. Dähr Misd dud doch schon bei de Fieße losgehn! Warum sinn de Fieße da undn? Was is das jedn Daach fiehr e Gequähle, wenn mor sisich de Soggn anzieh'n muss! Mor dud ja kaum rankomm an die Fieße da undn! Un ooch beim Fießewaschn... odor ooch Schuhe anzieh'n - womeeschlich mid Schniersänkls... wennsde da schon e bißl schdeif im Greuze bisd, wird das gladd zu eim Schdaadsagd! Kenndn de Fieße nisch e bißl weidor ohm sein? Oder - was ooch helf'n däde - wenn de Arme längor sein dädn. Wie bei de Gorillas. Die hamm keene Broblehme, wennse sisich an de Fieße gradzn wolln! Un a brobohs gradzn - warum duds offm Greuze immor dord juggn, wo de disch nisch gradzn kannsd! Das is doch eschd fies!

Odor ooch de Haare! Warum dun de Haare, wennsde e bißl äldor wern dusd, iborall dord wachsn, wo se eischendlich nischd zu such'n hamm? Schdadd offm Kobb dun die bei mir in dor Nase un in

de Ohrn wachsn. Meine Oochnbraun wern mähr un mähr zum Geschdribb! Abor ohm offm Kobb is zunehmende Vorwiesdung. Was mid eenor kleen Schneise angefang had, is jedzde e Kahlschlach gewordn. Un bei meinor Gudstn wachsn de Haare jedzde am Kinn un off de Zähne!

Un de Oochn - kennde denne nisch eens von die zweeje hindn sein? Odor ee zusätzliches? Da dädsch mir garandierd nisch so ofd dähn Kobb einrenn. Un wennsde off dor Schdraße leefsd, mißdesde dir nisch immor erschd dähn Hals vordrehn, wennsde jemand... also beschdimmdn sähenswirdischn Bersohnen hinnorhährguggn dusd.

Iborhaubd dähr Kobb - dähr däde viel bessor geschidzd sein, wennor nisch da ohm off de Schuldorn sidzn däde. Wenn mor dähn Kobb - ma angenomm - mid dähm Hindorn ausduschn däde, dann däde dor Kobb viel bessor sidzn. Ringsrum abgeschirmd un schdoßgesischord. Un wenn dir eenor ohm in dähn Arsch grieschn will, däde das dann viel mähr offfalln. Wobei - guhd, es is bei viele Mänschn ooch jedzde schon so, dass de gahr nisch unnorscheidn kannsd, ob die dähn Kobb ohm hamm odor dähn Hindorn. Was da so rauskomm dud, is jednfalls immor Sch... äh, schadschdoffreisch! Wenn isch da bloß ma so an beschdimmdde Leide denkn du... - so an... zum Beischbiel an... - ja, genau! Genau an die habsch jedzde ooch gedachd!

Eduard Sachsenmeyer